

ЎЗБЕКИСТОН РЕСПУБЛИКАСИ
ВАЗИРЛАР МАҲКАМАСИНИНГ
Қ А Р О Р И



ПОСТАНОВЛЕНИЕ
КАБИНЕТА МИНИСТРОВ
РЕСПУБЛИКИ УЗБЕКИСТАН

27 июнь 2018 й.г. № 485

Тошкент ш. – г. Ташкент

Ўзбекистон Миллий олимпия кўмитаси ҳузуридаги спортчиларнинг олимпия тайёргарлиги марказлари фаолиятини ташкил этиш чора-тадбирлари тўғрисида

Ўзбекистон Республикаси Президентининг “Жисмоний тарбия ва спорт соҳасида давлат бошқаруви тизимини тубдан такомиллаштириш чора-тадбирлари тўғрисида” 2018 йил 5 мартдаги ПФ-5368-сон Фармони ижросини таъминлаш, шунингдек, юқори маҳоратли спортчиларни комплекс, шу жумладан олимпия спорт турлари бўйича юқори даражада тайёрлаш, аҳоли, айниқса, ёшлар ўртасида соғлом турмуш тарзини кенг тарғиб қилиш мақсадида Вазирлар Маҳкамаси **қарор қилади:**

1. Ўзбекистон Республикаси Президентининг “Жисмоний тарбия ва спорт соҳасида давлат бошқаруви тизимини тубдан такомиллаштириш чора-тадбирлари тўғрисида” 2018 йил 5 мартдаги ПФ-5368-сон Фармонига мувофиқ:

Самарқанд вилояти Самарқанд туманида универсал олимпия тайёргарлиги ва халқаро мусобақалар ўтказиш маркази;

Тошкент вилояти Бўстонлик туманида миллий терма жамоаларнинг универсал олимпия тайёргарлиги маркази;

Жиззах вилояти Зомин туманида гимнастика бўйича олимпия тайёргарлиги маркази;

Наманган вилояти Чортоқ туманида спорт ўйинлари бўйича олимпия тайёргарлиги маркази;

Қашқадарё вилояти Шахрисабз туманида спорт яккакурашлари бўйича олимпия тайёргарлиги маркази (кейинги ўринларда марказлар деб аталади) ташкил этилганлиги маълумот учун қабул қилинсин.

Бунда давлат мулки объектлари Ўзбекистон Миллий олимпия кўмитасига беғараз муддатсиз фойдаланиш ҳуқуқи асосида берилган.

Ўзбекистон Миллий олимпия кўмитасига юқорида кўрсатилган давлат мулки объектларини кейинчалик марказларга мақсадли фойдаланиш ва хўжалик фаолияти юритиш учун беғараз фойдаланиш (тасарруф этиш ҳуқуқисиз) учун беришга рухсат этилсин.

2. Қуйдагилар марказларнинг асосий вазифалари деб белгилансин:

жаҳон ва Осиё чемпионатларида, Олимпия, Паралимпия ва Осиё ўйинларида, Универсиадалар, бошқа халқаро ва минтақавий мусобақаларда Ўзбекистон шарафини муносиб ҳимоя қилишга қодир халқаро тоифадаги спортчиларни, терма жамоалар аъзоларини тайёрлаш учун зарур спорт инвентарлари билан жиҳозланган замонавий, халқаро талаблар ва стандартларга жавоб берадиган моддий-техника ҳамда ўқув-машғулот базасини ташкил этиш;

спортнинг олимпия турлари бўйича Ўзбекистон миллий терма жамоалари (кейинги ўринларда терма жамоалар деб аталади) спортчиларини марказлаштирилган тартибда тайёргарлик кўришини таъминлаш;

олимпия спорт турлари бўйича терма жамоаларни, спорт захирасини тайёрлаш мақсадида ўз фаолиятини таъминлаш учун ўзининг моддий-техника базасини ривожлантириш;

спортчилар, терма жамоалар аъзоларининг ўқув-машғулот жараёнини халқаро стандартлар даражасида ташкил этиш, халқаро тоифадаги спортчиларни тайёрлаш учун юқори малакали тренер-мутахассислар, психологлар ва методистларни, шу жумладан хориждан кенг жалб қилиш ҳисобига ўқув-машғулот жараёнига илғор халқаро тажриба инobatга олинган ҳолда янги илмий-услубий технологияларни жорий этиш орқали уларнинг назарий ҳамда техник-тактик тайёргарлиги сифатини мунтазам ошириш;

тренерлар ва спортчиларнинг профессионал даражасини ошириш, шу жумладан хорижий спортчилар ва тренерлар учун пулли асосда ўқув-машғулот йиғинларини ўтказиш мақсадида тажриба алмашиш бўйича хорижий спорт мактаблари, клублари ва марказлари билан ҳамкорликни кучайтириш.

3. Белгилансинки, марказларнинг моддий-техника базасини жорий таъминлаш ва мустаҳкамлаш Ўзбекистон Миллий олимпия қўмитасининг маблағлари, марказларнинг хизматлар кўрсатишдан тушадиган даромадлари, хайрия маблағлари ва қонунчиликда тақиқланмаган бошқа манбалар ҳисобидан амалга оширилади.

4. Ўзбекистон Миллий олимпия қўмитаси хориждан етакчи мутахассисларни албатта жалб этган ҳолда, марказларни юқори малакали мутахассислар ва тренерлар билан тўлдириш бўйича зарур чоралар кўрсин.

5. Ўзбекистон Миллий олимпия қўмитаси, Жисмоний тарбия ва спорт вазирлиги, Самарқанд, Жиззах, Қашқадарё, Наманган ва Тошкент вилоятлари ҳокимликларининг:

Самарқанд вилоятининг Самарқанд туманида универсал олимпия тайёргарлиги ва халқаро мусобақалар ўтказиш марказини қуриш;

Жиззах вилоятининг Зомин туманида гимнастика бўйича олимпия тайёргарлиги маркази, Қашқадарё вилоятининг Шаҳрисабз туманида спорт яккакурашлари бўйича олимпия тайёргарлиги маркази, Наманган вилоятининг Чортоқ туманида спорт ўйинлари бўйича олимпия тайёргарлиги маркази, Тошкент вилоятининг Бўстонлик туманида миллий терма жамоалар учун универсал олимпия тайёргарлиги марказини (кейинги ўринларда объектлар деб аталади) реконструкция қилиш тўғрисидаги таклифлари маъқуллансин.

6. Объектларни қуриш ва реконструкция қилиш доирасида:

тегишли ҳокимликлар ҳузуридаги “Ягона буюртмачи хизмати” инжиниринг компаниялари – буюртмачи;

тендер савдолари яқунлари бўйича белгиланган тартибда аниқланган ташкилотлар - бош лойиҳа ва пудратчи ташкилотлар этиб белгилансин.

7. Қуйидагилар лойиҳа-қидирув ва қурилиш-монтаж ишларини бажариш, шунингдек, объектларнинг моддий-техника базасини такомиллаштириш ҳамда уларни ускуналар билан жиҳозлаш борасидаги харажатларни молиялаштириш манбалари этиб белгилансин:

а) лойиҳа-қидирув ҳужжатларини ишлаб чиқиш, объектларни қуриш, реконструкция қилиш ва ҳудудларни ободонлаштириш бўйича – Ўзбекистон Республикаси Жисмоний тарбия ва спорт вазирлиги ҳузуридаги Жисмоний тарбия ва спортни ривожлантириш жамғармаси маблағлари;

б) моддий-техника базани такомиллаштириш, спорт ускуналари, анжомлари ва кийимлари билан таъминлаш бўйича – Ўзбекистон Миллий олимпия қўмитасининг маблағлари, хайрия маблағлари, халқаро ташкилотлар грантлари ва қонунчиликда тақиқланмаган бошқа манбалар;

в) уларнинг белгиланган стандартларга мувофиқ узлуксиз ишлашини таъминлаш ҳисобга олиниб, ташқи электр, газ таъминоти ва алоқа тармоқларини қуриш ва кўчириш бўйича – тегишли вилоятларнинг маҳаллий бюджети маблағлари.

8. Самарқанд вилоятининг Самарқанд тумани ҳокимлиги Самарқанд вилояти Инжиниринг компаниясига “Конигил агротехсервис” МЧЖ агрофирмаси ҳудудидан универсал олимпия тайёргарлиги ва халқаро мусобақалар ўтказиш марказини барпо этиш учун умумий майдони 15,0 гектар бўлган ер участкасини белгиланган тартибда ажратгани маълумот учун қабул қилинсин.

9. Ўзбекистон Миллий олимпия қўмитаси, Самарқанд, Жиззах, Қашқадарё, Наманган ва Тошкент вилоятлари ҳокимликлари:

манфаатдор вазирлик ва идоралар билан биргаликда объектларни қуриш ҳамда реконструкция қилиш, ташқи муҳандислик ва транспорт коммуникацияларини ўтказиш билан боғлиқ ташкилий ва техник масалаларни ҳал этсин;

бош лойиҳа ташкилоти билан биргаликда лойиҳа-смета ҳужжатларини ишлаб чиқсин ва уларни ваколатли давлат экспертиза органлари билан келишишни таъминласин;

Жисмоний тарбия ва спорт вазирлиги, Қурилиш вазирлиги, буюртмачи ва бош пудратчи ташкилот билан биргаликда олимпия тайёргарлиги марказларини ташкил этиш тадбирларининг иловага мувофиқ асосий босқичлари асосида объектларни 2020 йилнинг охиригача фойдаланишга топширсинлар.

10. Ўзбекистон Республикаси Қурилиш вазирлиги объектларда қурилиш-монтаж ишларининг сифати юзасидан давлат архитектура-қурилиш назоратини ўрнатсин.

11. Мазкур қарорнинг бажарилиши назорат қилиш Ўзбекистон Республикаси Бош вазирининг биринчи ўринбосари – “Ўзбекистон темир йўллари” АЖ бошқаруви раиси А.Ж.Раматов, Бош вазир ўринбосари А.А.Абдуҳакимов ва Ўзбекистон Республикаси Жисмоний тарбия ва спорт вазири Ш.Х.Исроилов зиммасига юклансин.

**Ўзбекистон Республикасининг
Бош вазири**

А. Арипов



Вазирлар Маҳкамасининг
2018 йил 27 июндаги
485-сон қарорига
илова

**Олимпия тайёргарлиги марказларини ташкил этиш тадбирларининг
АСОСИЙ БОСҚИЧЛАРИ**

Босқичлар	Асос	Объектлар	Чоралар	Бажариш муддатлари	Масъуллар
1-босқич	Ўзбекистон Республикаси Президентининг 2018 йил 5 мартдаги ПФ-5368-сон Фармони	Самарқанд вилояти универсал олимпия тайёргарлиги маркази. Тошкент вилояти универсал олимпия тайёргарлиги маркази. Жиззах вилояти олимпия тайёргарлиги маркази.	Олимпия тайёргарлиги марказларини ташкил этиш тадбирлари	Вазирлар Маҳкамасининг қарори қабул қилингандан кейин бир ой муддатда	Миллий олимпия қўмитаси, Самарқанд, Тошкент, Жиззах, Наманган, Қашқадарё вилоятлари ҳокимликлари
		Наманган вилояти олимпия тайёргарлиги маркази. Қашқадарё вилояти олимпия тайёргарлиги маркази.	Олимпия тайёргарлиги марказларини қуриш, реконструкция қилиш, моддий-техник жиҳозлашни молиялаштириш учун инвесторлар ва салоҳиятли манбаларни жалб этиш	2018 йил 31 декабргача	Миллий олимпия қўмитаси
2-босқич	Самарқанд, Тошкент, Жиззах, Наманган, Қашқадарё вилоятлари ҳокимликлари, Қурилиш вазирлиги, Жисмоний тарбия ва спорт вазирлиги қарорлари	Самарқанд вилояти универсал олимпия тайёргарлиги маркази	Универсал спорт зали, спорт ўйинлар учун майдончалар, маъмурият биноси, 150 ўринли ётоқхона ва овқатланиш пунктини қуриш	2020 йил 1 ноябргача	Самарқанд, Тошкент, Жиззах, Наманган, Қашқадарё вилоятлари ҳокимликлари, Қурилиш вазирлиги, Жисмоний тарбия ва спорт вазирлиги
		Тошкент вилояти универсал олимпия тайёргарлиги маркази	Ётоқхонада 150 ўринли ва овқатланиш пунктига эга меҳмонхона биносини реконструкция қилиш, универсал спорт зали, ёпиқ сув ҳавзаси, спорт ўйинлар учун майдончалар ва маъмурий бинони қуриш	2020 йил 1 ноябргача	

		Жиззах вилояти олимпия тайёргарлиги маркази. Наманган вилояти олимпия тайёргарлиги маркази. Қашқадарё вилояти олимпия тайёргарлиги маркази.	Ихтисослаштирилган спорт заллари, спорт ўйинлар учун майдончалар, маъмурият биноси, 100 ўринли ётоқхона ва овқатланиш пунктини қуриш	2020 йил 1 декабргача	
3-босқич	Миллий олимпия кўмитаси қарори	Барча Олимпия тайёргарлиги марказлари	Зарур мебель, компьютер ва бошқа техника, спорт анжомлари ва ускуналари билан жиҳозлаш	Объект фойдаланишга топширилгандан сўнг икки ой муддатда	Миллий олимпия кўмитаси
4-босқич	Миллий олимпия кўмитаси қарори	Барча Олимпия тайёргарлиги марказлари	Универсал олимпия тайёргарлиги марказларини юқори малакали тренерлар ва мутахассислар билан тўлдириш	Объект фойдаланишга топширилгандан сўнг икки ой муддатда	Миллий олимпия кўмитаси